

**Lita Paulalu Walkatjura  
Iyantja Wati Ini  
Taitatjalakutu  
Titus  
Nyangatja Nganmanytju  
Nyakula Wangkanytjaku**

Nyangatja lita Godaku tjukurpa Paulalu walkatjura iyantja wati ini Taitatjalakutu. Wati nyanga paluru nganmanypa Paulala tjungu warkaringi munu Tjukurpa Palya wangkangi. Munu pula tjungu anu manta tjukutjuku ini Kuritalakutu urungka ngururpa, munu pula manta nyara palula ngura tjutangka para-ngarala Tjukurpa Palya Jesunyatjara anangu tjutangka tjakultjunangi. Palulanguru Paulanya malaku anu manta pulkakutu munu Taitatjanya wantikatingu anangu Jesuku kuwari kutju walytjaringkunyitja tjutangka wangkara nintintjaku.

Ka lita nyangatja Paulalu palulakutu iyanu manta nyara Kuritala nyinanyangka. Munu paluru Taitatjala wangkangu wati nyara palunya ngurara mankurpa ngurkantankunyitjaku tjana Jesuku walytja tjuta atunymara kanyintjaku. Munu paluru piruku wangkangi alatji, "Tjanala nintinma wirura palyanyku nyinanytjaku pikaringkuwiya munu Jesunya tjukarurungku wanantjaku. Panya Jesunya mantakutu

pitjangu anangu tjuṭa wankarunkunytjikitja tjana palumpa mulamularingkula Kurunpa Milmilngatjararingkula Godaku walytjar- ingkula wirura nyinanytjaku.” Alatji Paulalu walkatjura iyanu Taitatjalakutu paluru Kuritanya ngurara tjuṭangka nintintjaku.

### **Tjukurpa nyanganpa ngaranyi:**

1:1-4 Paulalu ngaṅmanytju wangkanytja

1:5-16 Aṭunymankupai tjuṭa ngurkantankun- ytjaku munu ngunti wangkapai tjuṭa paint- jaku

2:1-15 Godaku walytja tjuṭa wangkara tjukaruruntjaku

3:1-11 Godalawanu tjukaruru palyanyku ny- inanytjaku munu tjukurpa kurakura tjuṭa kulira wantinytjaku

3:12-15 Paulalu tjukurpa maḷatja wangkanytja

### *Paulalu Ngaṅmanytju Wangkanytja*

<sup>1</sup> Uwa Taitatja, ngayuluna Paulalu lita nyangatja nyuntumpa walkatjunanyi. Ngayulu panya Mayatja Godaku warkaripai, mununa tjukurtjara Jesulu Christalu iyantja panya. Godalu anangu tjuṭa ngurkantanu palunya wanantjaku munu panya ngayunya witura iyanu palula tjanala tjukurpa tjukaruru tjakultjunktjaku. Kana palunya tjananya wangkara nintilpai Christaku tjukaruru mulamularingkunytjaku. Mununa tjanala wangkapai tjukurpa Jesulu wangkanytja uwankaraku tjana nintiringkula tjukarurungku uti kulintjaku. Panya tjukurpa nyanga tjukaruruku nintiringkulaya tjana kulilku

tjukururu nyinanytjikitjangku Godalu nyakula pukularinytjaku.

2-3 Uwa, ngana Jesuku mulamularingkunytjatjanungku ala-alangku patani ngula Godalu nganannya wankara pakaltjingara palula tjungura titutjarangku kanyintjaku. Panya Godalu nganmanytju mulapa uwankara paluntja kuwaripangka kalkunu palumpa walytja tjuta wankaru titutjarangku kanyintjikitjangku. Munu mulapatu tjintu panya paluru kalkuntjatjanungku Godalu palumpa tjukurpa wiru Jesunyatjara anangu tjutangka utinu tjintu panya palula alatjitu, panya paluru ngunti wangkapai wiya. Munu paluru ngayunya witura iyanu tjukurpa nyanga palunya Jesunyatjara tjanala tjakultjunktjunktjaku, kana mulapatu tjanala para-tjakultjunangi Godalu nganampa wankarunkupailu witunnyangka.

4 Uwa Taitatja, lita nyangatjana nyuntumpa walkatjunanyi, panya ngayulu tjukurpa Jesunyatjara nyuntula nganmanytju wangkangu ka panyan kulira mulamularingu, kana nyara palulanguru nyuntunya katjanmananyi. Ka Mama Godalu Jesulu Christalu kulu nyuntunya pukultju pulkangku kanyinma munu nyuntunya kurunpa rapara pukulmanama.

### *Atunymankupai Tjuta Ngurkantankunytjaku*

5 Uwa Taitatja, nyuntu panya ngali manta nyara Kuritala nyinaralpi Jesuku walytja tjutangka warkaringi. Palu panya ngayulu ngatalnguru anu malaku manta pulkakutu munu panya nyuntunya wantikatingu manta

nyara palula Godaku war̄ka rawangkuṭu palyantjaku. Panya nyuntunyaṅa wangkangu Jesuku walytja tjuṭa nintintjaku ngura kutjupangka kutjupangka manta nyara Kuritala munu tjananya tjukaruruntjaku. Munu panyaṅanta piruku wangkangu wati atunymankupai mankurpa ngurkantara tjunkunytjaku ngura panya palula tjanala Jesuku walytja tjuṭa atunymankunytjaku.

<sup>6</sup> Ka uti wati nyara paluru tjana tjukaruru nyinama kura palyantja wiya kutjupa tjuṭangku palunya tjananya nyakula kuranmankunytjaku-tawara. Munuya uti paluru tjana kuri walytjangka kutju nyinama kutjupaku nyakula mukuringkunytja wiya. Ka uti palumpa tjanampa tjitji tjuṭa kulu palu purunypatu nyinama Jesuku walytja mulapa, munuya ngunytjungka mamangka tungunpungkunytja wiyangku wanganarangku kulira palyanyku nyinama, kutjupa tjuṭangku tjananya nyakula kuranmankunytjaku-tawara.

<sup>7</sup> Panya Godalu wati atunymankupai tjuṭa ngurkantankupai palumpa walytja tjuṭa atunymara kanyintjaku, kaya uti palya mulapa tjukaruru nyinama anangu kutjupa tjuṭangku nyakula anantjaku-tawara. Munuya uti walytjangku tjananku mirawaninytja wiyangku wantima munuya anangu tjuṭa kutju alpamilantjikitjangku kulinma kananykananytju wituwituntja wiyangku. Munuya uti mirpanarira mapalku waruringkunytja wiyangku wantima, munuya wama pulka tjikira tarangkarinytja wiyangku wantima.

Uwa, utiya atunymankupai paluru tjana anangu kutjupa tjuta pikangu pungkuwiyangku wantima, munuya uti anangu kutjupa ngunti kurantja wiyangku wantima mani pulka mantjintjikitjangku.

<sup>8</sup> Munuya uti wirura nyinama, munuya ngura kutjupanguru pitjala nyinanyangka papulara wantinytja wiyangku altira tjanampa walingka mukulyangku kanyinma. Munuya uti paluru tjana wiru tjuta kutju pukultu palyantjikitja mukuringama anangu tjutaku. Munuya uti wala winkingku palyantja wiyangku atatjura kulira palyanma ngunti kura palyantjaku-tawara. Munuya uti Godala tjukaruru palyanyku nyinama munu palula kutju kulinma.

<sup>9</sup> Uwa, utiya atunymankupai paluru tjana Tjukurpa Palya Jesunyatjaraku pulkara mulamularingama, panya tjukurpa paluru tjukaruru alatjitu kampa kutjuparipai wiya. Tjukurpa palunya panyali nganmanytju tjanala wangkara nintinu tjukarurungku kulintjaku, kaya uti tjukurpa palunya kulira titutjarangku tjukarurungku kulilkatima wantinytja wiyangku. Munu palulanguru paluru tjana Jesuku walytja tjutangka tjukurpa palunya nintingku tjukarurungku nintilku, kaya kulira raparingkuku munu kunpuringkuku. Ka tjinguru anangu kutjupangku tjukurpa palunya wiyanmarā wantiku, ka uti wati panya atunymankupaingku palunya nintingku wangkara tjukarurunma.

*Ngunti Wangkapai Tjuta Paintjaku*

10 Panya ngura nyara palula anangu tjutangku Tjukurpa Palya wangkanyangka tjana wiyanmarā wantipai munuya kampa kutjupara tjukurpa ngunti wangkapai anangu kutjupa tjuṭa ngunti kurantjikitjangku. Kutjupa tjutangkuya ngunti wangkapai alatji, “Utiya malikitja tjutangku Jesuku mulamularingkula Jew tjuṭaku ara kulira wanānma.” Alatjiya Jesuku walytja tjuṭa ngunti wituwitulpai.

11 Ka Taitatja, nyuntu munu wati atunymankupai kutjupa tjutangku kulu uti Jew palunya tjananya wangkara markunma ngunti nintintja wiyangku wantinytjaku, panya alatji wangkara tjana anangu kutjupa tjuṭa ngunti kurara kawantjingani manikitjangku ngunytju mama tjitji kulukulu. Ka nyura nyanga palulanguru uti tjananya markunma.

12 Panya wati wangkatjara kutjungku ngura pala Kuritanya ngurarangku tjukarurungku wangkangu alatji, “Kuritanya ngurara tjutangkuya ngunti wangkapai. Paluru tjana kura pulka palyalpai munuya paluru tjana inura purunypa pikati alatjitu. Munuya pakuringkula waraka palyantja wiya wantira nyinapai munuya rawangku manyungku mai kuka pulka ngalkupai.”

13-14 Alatji wati panya wangkatjarangku nitingku tjukarurungku wangkangu. Ka nyuntu tjananya Jesuku walytja tjuṭa pulkara painma tjukurpa kampa kutjupara wangkawiyangku wantinytjaku. Munu tjananya wangkara tjukarurunma Tjukurpa Palya Jesunyatjara tjukarurungku kulintjaku.

Panya Jew kutjupa tjutangku ara ngunti tjuta walytjangku kulintjitja wangkapai. Tjana panya tjukurpa tjukararuru Jesunyatjara wantingu munuya tjukurpa ngunti tjuta tjana walytjangku kulintja wangkanyi munuya anangu Jesuku walytja tjuta ngunti wangkara wituwitulpai palula tjanala kutju kulintjaku. Ka nyuntu tjanala wangkama tjukurpa palumpa tjanampa kulilwiyangku wantinytjaku munu tjukurpa tjukararuru Jesunyatjara kutju kulintjaku.

15 Panya anangu palyanyku nyinapai tjutangku mai kutjupa kutjupa uwankara ngalkupai palya kulra. Palu anangu ngunti kulilpai tjutangku Jesunya wantira mai kutjupa kutjupa uwankara kanpanmankupai. Panya nyara paluru tjana kulintja kawakawa kura mulapa, munuya putu tjukaraurungku ngurkantankupai kura munu palya, munuya putu tjukararuru nyinapai.

16 Uwa, paluru tjana wangkapai alatji, “Nganana Godaku ninti pulka munula palunya tjukaraurungku wanalpai.” Palu wiya, tjana kura kutju rawangku palyalpai, kala nyara palulanguru tjananya palyannyangka nyakula mapalku ngurkantankupai munula alatji kulilpai, “Wiya, nyanganpa Godaku ninti wiya ngurpa, munuya palunya wiyanmankupai alatjitu.” Uwa, tjana Godala tungunpungkupai munuya putu alatjitu kulilpai wirura palyanyku nyinanytjikitjangku. Nyara palulangurula tjananya ngurkantankupai tjana Godaku ngurpa nyinanyangka.

## 2

### *Godaku Walytja Tjuta Wangkara Tjukururuntjaku*

<sup>1</sup> Uwa Taitatja, nyuntu panya Tjukurpa Palya Jesunyatjara tjukururungku kulilpai, munu nyuntu uti tjukurpa nyanga palunyatu tjanala wangkara nintinma tjana kulu kulira wirura palyanyku nyinanytjaku tjukurpa pala palulawanu kutju. <sup>2</sup> Munu wati pulka tjutangka wangkama alatji, “Wati tjuta kulilaya! Munuya purkarangku kulinma mirpanarinytja wiyangku munuya pukulpa wirura nyinama anangu tjutangku nyuranya nyakula pukularinytjaku. Munu nyura uti Godaku mulamularingkula palumpa tjukurpa titutjarangku kulinma wantinytja wiyangku. Munuya anangu kutjupa tjutaku pulkara mukuringkula palyanma wiru tjuta kutju. Munuya kutjupa tjutangku nyuranya ananra kurannyangka wantinytja wiyangku titutjarangku tungun-tunguntu Jesunya wananma.” Alatji-puta tjanala wangkama wati panya pulka tjutangka.

<sup>3</sup> Munu minyma pulka tjutangka kulu alatji wangka, “Kulilaya! Nyura uti Godaku mulamularingkunytjatjanu palulawanu wirura palyanyku nyinama. Munuya kampakkatu wangkanytja wiyangku wantima, munu wama pulka tjutangka tarangkarinytja wiya wirura nyinama. Munuya wiru tjuta kutju nintinma, kaya minyma malatja tjutangku nyurala kulira nintiringkuku wiru



tjuta kutju palyantjikitja nyuranya nyakunytjatjanungku.

<sup>4</sup> Panya nyura alatji wirura nyinara nintinyangkaya minyma tjukutjuku paluru tjana tjukarurungku kulilku wati kuri tjitji tjuta kulu mukulyangku wirura kanyintjikitjangku." Alatji tjanala wangkama minyma pulka tjutangka.

<sup>5</sup> Munu minyma tjukutjuku tjutangka kulu alatji wangka, "Kulilaya! Purkarangkuya kulinma mirpanarinytja wiyangku, munuya pukulpa wirura nyinama wati kutjupangka ngarinytja wiya kuri walytjangka kutjuya nyinama. Munuyanku ngura walytjanguk wirura atunymara kanyinma, munuya anangu kutjupa tjutaku kulu mukuringkula wiru tjuta kutju tjanampa palyanma. Munuya wati kuringku wangkanyangka wanganarangukulira palyanma." Uwa alatji tjanala wangkara nintinma minyma tjukutjuku tjutangka. Panya paluru tjana alatji wirura nyinanyangkaya anangu kutjupa tjutanguk tjananya nyakula Godaku tjukurpa putu wiyankanku.

<sup>6</sup> Munu wati tjukutjuku tjutangka palu purunypatu wangka nyanga alatji, "Purkarangkuya kulinma mirpanarinytja wiyangku, munuya titutjara pukulpa wirura nyinama."

<sup>7</sup> Alatji tjanala wangka munu nyuntu kulu wirura palyanma tjana nyakula nyuntu purunytju arkara palyantjaku. Munu tjanala Godaku tjukurpa mulamulangku tjukarurungku tjakultjunama tjana tjukarurungku Godanya kulintjaku, nyuntunya mirawaninytjaku wiya.

<sup>8</sup> Munu tjananya wirura palyanyku wangkara nintinma tjukurpa tjukaruru kutju alatjitu. Panya nyura tjukurpa tjukaruru kutju wangkanyangka anangu kutjupa tjutangku kulira nyuranya putu kuranmankuku. Kaya nyuntumpa mirpantju tjutangku nyakula kulira kuntaringkuku munuya putu kulilku nyuntunya ngalnya kurara pungkunytjikitjangu.

<sup>9</sup> Munu piruku wangka wati unytju warkaripai tjutangka nyanga alatji, "Kulilaya, nyurampa mayatjangu waraku witunnyangkaya wanganarangu kulira palyanma kuraringkuwiyangu. Munuya wirura warakarima nyurampa mayatjangu nyakula pukularinytjaku.

<sup>10</sup> Munuya nyurampa mayatjaku mantara munu kutjupa kutjupa tjuta kulu nyakula kutitjungkunytja wiyangu wantima. Wiruraya wanganara warakarima nyurampa mayatjangu nyakula nyuranya wiru kulintjaku alatji, 'Munta wati nyanganpa wiru mulapa, tjukarurungku kutju palyalpai.' " Alatji tjanala wangka wati panya unytju warkaripai tjutangka, ka paluru tjana nyuntula kulira wirura warakariku, kaya anangu kutjupa tjutangku tjananya nyakula kulilku, "Munta, mulapa Godaku tjukurpa pulka alatjitu, kalanku uti kulira nintiringama tjukurpa nyanga wankarunkupaiku."

<sup>11</sup> Uwa, Jesuku walytja tjutangka nintinma tjukaruru palyanyku nyinanytjaku, panya Godanya anangu uwankaraku pulkara mukuringu munu panya pukultju pulkangku anangu tjuta

wankarunkunytjikitjangku katja palumpa iyanu nganampa ngalkilpa ilunytjaku.

<sup>12</sup> Munu panya Godalu nganannya rawangku nintini palunya tjukarurungku wanantjaku kura kutjupa kutjupa tjuta wantira. Panya paluru mukuringanyi ngana purkarangku kulintjaku mirpanarinytja wiyangku, munu tjukaruru wirura palulawanu nyinanytjaku.

<sup>13</sup> Uwa, Mamanya mukuringanyi ngana alatji titutjara nyinanytjaku Mayatja Jesunya Wankarunkupainya malaku pitjanytjaku patara. Panya nyara palula arangka ngana palunya nyakuku pitalytji pulka pitjanyangka witulya alatjitu.

<sup>14</sup> Nyara paluru panya nganampa ngalkilpa ilungu Godalu nganannya kura palyantjitjangu kalypangku pungkuwiyangku wantinytjaku. Paluru ilungu nganannya wankarunkunytjikitja ngana karalyarira kura wantira palula tjunguringkula palumpa walytja mulapa nyinanytjaku tjukaruru mulapa. Kala nyara palulanguru uti palula wanganarangku kulira kutjupa kutjupa wiru tjuta ipilytju palyanma.

<sup>15</sup> Uwa, tjukurpa nyanga palunya tjananya rawangku tjanala nintinma manta pala Kuritala nyinanytja tjutangka. Panya Godalu nyuntunya ngurkantara tjunu palumpa waraka rapangku palyantjaku ngura nyara palula, ka nyuntu tjanala rapangku wangkama nyuntunya ananyangka kulira tjituru-tjitururinytja wiyangku. Munu tjananya wangkara kunpunma rawangku Jesunya wanantjaku. Munu kutjupa tjutangku

kura palyannyangka nyakula tjananya ngulu wiyangku wangkara tjukarurunma.

### 3

#### *Wiru Tjuta Kutju Palyantjaku*

<sup>1</sup> Uwa Taitatja, anangu Jesuku walytja tjutangka wangka tjana mayatja tjutangka wanganarangku kulintjaku wati kamanta pulka tjutangka kulu. Wangka tjananya wirura palyanyku nyinanytjaku munu anangu kutjupa tjutaku kulu rawangku wirura pukultu palyantjaku.

<sup>2</sup> Munu tjanala wangka anangu kutjupa tjuta nyakula wangkawiyangku wantinytjaku munu pikaringkuwiya kalypa nyinanytjaku uwankaraku mukulya. Uti tjananku mirawaniwiyangku wantira anangu tjutangka pilunpa pukulpa nyinama.

#### *Godalu Ngaltunytju Pul kangku Nganananya Kuranguru Wankarunu*

<sup>3</sup> Panya nganmanypa nyuntu nganana watarku nyinangi Godaku ngurpa, munula palula tungunpungkula palumpa tjukurpa wanganarangku kulira palyalpai wiya. Kaya kutjupa tjutanku nganananya ngunti kurara wituwitulpai tjanala tjunguringkula kura palyantjaku. Kala iwara kuraku pulkara mukuringkula kura puu wantingi munula walytjangku kulira kura kutju palyaningi munula anangu kutjupa tjutanku kutjupa kutjupa wiru tjananku walytjangku kanyinnyangka nyakula nyararingkupai. Kaya

kutjupa tjuṭa nganampa pulkara kuraringkupai, ka nganaṅa ngapartji kuraringkupaitu tjanampa.

<sup>4-5</sup> Uwa, nganaṅa kura mulapa nyinangi Godanya kulintja wiya alatjitu, kalanya uti pungkula iluntanama. Palu Godanya nganampa pulkara mukuringu ngaltunytju pulka munu panya palumpa katja iyaṅu mantakutu nganampa ngalkilpa anga-ilunytjaku. Nyara palulanguru, nganampa ilunyangka Godalu nganaṅanya kura tjuṭa palyantjitjanguru kalypanku wantinyi pungguwiyangu. Tjinguru nyura kulini paluru nganaṅanya wiru tjuṭa palyantjitjanguru wankarunu. Palu wiya, paluru nganampa pulkara ngalturingkula nganaṅanya wankarunu palula tjungu titutjara nyinanytjaku. Paluru Kurunpa Milmilnga nganaṅala unngu tjarpatjunu, ka paluru nganaṅanya kurunpa kampa kutjupanu nganaṅa kura palyantja wiyaringkunytjaku. Kala nyara palulanguru wankaru nyinanyi wanka kuwaritjatjara.

<sup>6-7</sup> Uwa, Godalu intjanungku Kurunpa Milmilnga nganaṅala unngu tjarpatjunu Jesunya Christanya nganampa ngalkilpa ilunyangka. Alatji paluru nganampa pulkara mukuringkula palyaṅu ngaltunytjungku kutjukampa alatjitu, munulanya alatji wangkangu, “Ngayulu kuwari nyuranya kura tjuṭa palyantjitjanguru pungkunytjaku wiyaringu, panya Jesunya nyurampa ngalkilpa ilunyangka.” Ka nyara palulanguru nganaṅa mulamularingkula ala-ala patara nyinanyi

paluru nganannya kalkuntjatjanungku ngura wirukutu katinytjaku, panya ngura nyara palulala ngana palula tjungu wanka titutjara nyinaku.

<sup>8</sup> Uwa Taitatja, tjukurpa nyanganpa ngayulu nyanga nyuntula wangkanytja uwankara tjukaruru mulapa ngaranyi. Ka nyuntu Jesuku walytja tjutangka rapangku wangkara nintinma mulamulangku, kaya nyuntula kulira wiru tjuta kutju titutjarangku palyantjikitjangku kulilku anangu tjuta alpamilantjikitjangku. Panya tjukurpa nyanga ngayulu nyuntula wangkanytja tjuta wiru mulapa ngaranyi, kaya anangu tjutangu wanganarangku kulirampa Godanya tjukarurungku wanantjikitja nintiringkuku.

*Tjukurpa Kurakura Tjuta Kulira Wantinytjaku*

<sup>9</sup> Palu anangu kutjupa tjutangkuya tjukurpa ara tjukutjuku tjuta unytjungku rawangku ngaparku wangkapai. Ka nyuntu palunya tjananya kulira wantima, panya tjana tjukurpa miri tjutatjara rawangku ngaparku wangkapai tjamu tjutaku ara tjuta kulukulu unytjungku alatjitu, munuya tjukurpa nyara palunya tjananya kutju kulilpai. Munuya paluru tjana Moseku tjukurnguru kulu wangkara pika-pikaringkupai. Palu tjana tjukurpa nyanga palu purunypa tjuta ngaparku wangkara Jesuku walytja tjuta putu wangkara kunpuni pukulpa rapa nyinanytjaku, ka nyuntu tjananya kulira wantima tjana wangkanyangka munu tjanala tjunguringkuntja wiyangku wantima.

10 Palu tjinguru anangu kutjupa tjutangka tjukurpa nyanga purunypa Jesuku walytja tjutangka rawangku wangkama, kaya kulira kulira pika-pikaringkula tjararingkula mauntalpa mauntalpa nyinaku. Nyara palula-tawara anangu palunya tjananya rawangku painma wantinytjaku. Ka tjinguru paluru tjana wantinytja wiyangku rawangku ngaparku wangkanyangka nyuntu uti palunya tjananya paira iyanma nyurala piruku tjunguringkula kurantjaku-tawara.

11 Kulinin Taitatja? Panya anangu nyanga palu purunypa tjuta kura nyinanyi kulintja kawakawa. Kaya anangu tjutangka palunya tjananya Godala tungunpungkunyangka nyakula nintingu kulilpai, "Mulapa paluru tjana tjukurpa kurakura ngunti wangkapai." Ka nyuntu Jesuku walytja tjutangka wangka anangu nyanga palu purunypa tjuta kulira wantinytjaku.

### *Tjukurpa Malatja*

12 Palu Taitatja, wanyu kulila. Ngayulu kulini wariringkunyangka ngura ini Nika-palitjala ankula nyinanytjikitjangku piriyakuturingkunytjaku patara. Palu ngayulu ankunytja kuwaripangkana wati kutju nyuntulakutu ma-iyalku tjinguru Atimatjanya munta tjinguru Titjikatjanya. Ka wati kutju nyuntula ma-wirkankunyangka nyakulampa nyuntu ngalya-pakala ngayulakutu munu ngaparikatira wirkara ngura panya Nikipala kananta nyara palula nyakuku.

<sup>13</sup> Ka nyangatja wati kutjara Apalatjanya pula Tjinatjanya kuwari nyanganguru ma-pakani ngura tjutakutu ankunytjikitja. Tjinatjanya panya lawyer, tjukurpa ara tjutaku ninti. Ka pula ma-wirkankunyangkampa palunya pulanya nyakula alpamilanma munu mai, mani, kutjupa kutjupa tjuta kulu ungama ngura kutjupa tjutakutu ankunytjaku. Palya?

<sup>14</sup> Uwa Taitatja, ngura nyara palula Jesuku walytja tjutangka rawangku wangkara nintinma tjana titutjarangku wiru tjuta kutju palyantjaku anangu ngaltutjara tjuta atunymankunytjikitjangku. Utiya wirura pakuringkuwiya warkarima, munuya palulanguru pukulpa nyinaku Godala mirangka.

<sup>15</sup> Uwa, alatjitunanta wangkanyi. Ka nyanga ngayula tjungu nyinanytja tjutanku nyuntunya kulini nyuntumpa pukularira. Ka ngura nyara palula panya Jesuku walytja tjuta nganampa mukuringanyi, ka-puta palula tjanala wangka panya ngana tjananya rawangku tu kulini.

Uwa, ka Godalu nyuranya uwankara pukultjungku wirura kanyinma.



**Tjukurpa Palya**  
**Portions of the Holy Bible in the Pitjantjatjara**  
**language of Australia**

copyright © 2019 Bible Society of Australia

Language: Pitjantjatjara

Translation by: The Pitjantjatjara Bible Translation Project, Wycliffe Bible Translators and Bible Society Australia.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

---

PDF generated using Haiola and XeLaTeX on 18 Apr 2025 from source files dated 31 Aug 2023

b29b7786-0954-5b75-82cb-3657182b63d6